


# 8

## JESUS ANG MANLULUWAS



**Ang Matun-an Nimo Sa Sini Nga Leksyon**

Manluluwas sang Kalibutan  
Ngalan ni Jesus  
Kinaiya sang kaluwasan

Karnero sang Dios  
Halad sang Karnero nga Ginpatuhoy  
Mga Balatyagon sa Karnero

### **Manluluwas sang Kalibutan**

“Ang Anak sang Tawo nagkari sa pagpangita kag sa pagluwas sang nadula.” Amo ina ang kahulogan sang Kristohanon nga relihiyon. Ang pagkari ni Jesus sa kalibutan amo ang paagi sang Dios sa paghatag sang katubsanan sa nadula nga tawo. Ang Kristianismo nagabaton sang kamatuoran nga ang tawo indi makaluwas sang iya kaugalingon.

Ang mensahe sang Kristianismo amo ang kaluwasang sang tawo. Sa sini nga paagi may kinatuhay ini sa iban nga mga relihiyon. Ang iban nga mga relihiyon nagatinguha sa pagpaathag sang mataas nga mga lalambutan sa kabuhi. Nagapamilit sila nga ang tawo karon, kag sa palaabuton, yara sa kapaslawan. Ginsugiran nila ang tawo kon ngaa nagaantos sia, kon paano sia magkabuhi, kon paano siya silotan kon magkasala sia. Wala sila nagahatag sa tawo sing gahum sa pagkabuhi sing madinaugon batok sa sala. Apang si Kristo nagakadto sa mga katawhan sa tanan nga sari sang pangabuhi, sa bisan diin nga duog, kag nagadala sang mensahe sang kaluwasan. Mahimo nga nadagtaan ikaw sang higko sang sala, apang mahimo ikaw nga matinloan. Mahimo ini paagi sa gahum sang Manluluwas — ang Isa nga nagkari kag napatay para sa mga makasasala kag nabanhaw nga madinaugon batok sa kamatayon, sala, impiyerno, kag lulobngan.

Ang maayong balita sang ebanghelyo amo nga si Jesus nagkari agud magmangin-manluluwas para sa tanan nga mga katawhan. Sang pagkatawo ni Jesus, ang manugbantay sang karnero ginhambalan sang mga manugtunda:

**Lukas 2:10, 11.** Kag ang manugtunda nagsiling sa ila, “Dili kamo mahadlok; kay yari karon, ginatunda ko sa inyo ang maayong balita sang dakung kalipay nga mangin sa bug-os nga katawohan; kay natawo sa inyo karon nga adlaw sa banwa ni

David ang Manluluwas, nga si Kristo nga Ginoo!”

### **Ngalan ni Jesus**

Ang ngalan nga “Jesus” nagakahulogan si Jehovah magaluwas, ukon Manluluwas. Ang Dios nga Amay nagpili sining ngalan para sa Iya Anak. Ginpadala Niya ang Manugtunda sa pagsugid kay Jose (ang dutan-on nga amay ni Jesus) kon ano ang ipangalan sa Lapsag nga igabun-ag ni Maria. Ang ngalan nga Jesus magapahanumdom sa ila sa tanan nga tion kon si sin-o si Jesus kag kon ngaa nga natawo Sia. Anak Sia sang Dios, nga nagkari sa duta sa pagluwas sa aton gikan sa aton sala. Ang manugtunda nagsiling:



**Mateo 1:21.** “Magaanak sia sing lalaki, kag tawgon mo ang iya ngalan Jesus kay sia amo ang magaluwas sang Iya katawohan sa ila mga sala.”

Kon maghambal ukon makabati ka sang ngalan ni Jesus, panumdoma ang mensahe sang maayong balita para sa imo: si Jehovah, ang walay ginkamunan kag walay katapusan, ang nagluntad sing kinaugalingon nga Dios nagkari sa kalibutan sa pagluwas sa imo. Amo ini ang saad nga ginatindugan naton kon magpangamuyo kita sa Amay sa ngalan ni Jesus. Ihutik ang ngalan ni Jesus sa imo pagsimba kag sa pagpangamuyo. Mag-amba nahanungod kay Jesus sa imo pagsimba kag sa pagpangamuyo. Mag-amba nahanungod kay Jesus ang Manluluwas. Sugiri ang iban nahanungod sa Iya. Sia lamang ang Manluluwas — ang Isa nga ginpadala sang Amay sa pagluwas sa aton. Si Pedro kag si Juan nag-ayo sang piang nga tawo paagi sa ngalan ni Jesus. Si Pedro nagpaathag:

**Mga Binuhatan 3:16; 4:12.** “Kag ang iya ngalan, paagi sa pagtuo sa iya ngalan, nagpabaskog sining tawo, nga natan-aw kag nakilala; kag ang pagtuo

nga paagi kay Jesus nakahatag sa iya sing himpit nga pag-ayo sa atubangan ninyo tanan.”

Kay walay kaluwasan sa bisan kay sin-o nga iban, kag walay iban nga ngalan sa idalum sang langit nga ginhatag sa mga tawo nga paagi sa iya kinahanglan kita maluwas.”

### Buhati Ini

1. Ano ang kahulogan sang ngalan nga *Jesus*?  
.....
2. Sin-o ang nagpili sining ngalan para kay Jesus?
  - . a) Si Jose.
  - . b) Ang manugtunda nga si Gabriel.
  - . k) Ang Dios nga Amay.
3. Sauloha ang Mateo 1:21.
4. Sa Mga Binuhatan 3:16; 4:12 si Pedro nag-hambal nahanungod sa
  - . a) kaayohan paagi sa pagtuo sa ngalan ni Jesus.
  - . b) kaluwasan kay Jesus lamang.
  - . k) pagkabanhaw sa ngalan ni Jesus.
  - . d) ang a) kag b) sa ibabaw.
5. *Hunahunaa*: Ano bala ang kahulogan sang ngalan ni Jesus sa imo? Ano bala ang kahulogan sa imo kon magpangamuyo ka sa ngalan ni Jesus? Sambita sing mahinay ang Iya ngalan sa pagsimba, nga nagapang-hunahuna kon si sin-o Sia kag kon ano ang kahulogan Niya sa imo.
6. Sa wala pa ikaw magtuon sang nabilin nga bahin sining leksyon, basaha liwat ang leksyon, basaha liwat ang leksyon 2 sa mga bahin nga: *Seremonya nga Nagalaragway sang Palaabuton*, kag *Halad kag Manluluwas*.

## Kinaiya sang Kaluwasan

Ang tinaga nga *kaluwasan* sa Biblia isa ka daku nga tinaga, kay may madamo sing nasakupan. Ang pagluwas amo ang pagsagup gikan sa katalagman, sa paghilway gikan sa pagkabilanggo ukon sa paghukom, sa pgbutang sa hilway nga duog, kag sa pag-ayo .Si Jesus, ang aton Manluluwa, nagsagup sa aton gikan sa gahum ni Satanas, naghilway sa aton gikan sa pagkabilanggo sa sala, ginkuha ang aton bahim kag silot sa paghukom, ginadala kita sa isa ka hilway nga duog, kag ginahatagan kita sang kaayohan para sa lawas kag kalag.

*Si Jesus nagkari sa pagluwas sa aton gikan sa pagkadula kag sa mga katalagman sang isa ka kabuhi nga napahamulag sa Dios.* Ang sala nag nagpahamulag sa aton gikan sa Dios. Nadula naton ang aton dalan. Naglibotlibot kita sa kadudolman Kon wala ang Dios, ang walay katapusan nga kamatayon magalikop sa aton. Apang is Jesus nagkari sa pagluwas sa aton, sa pagdala sa aton pabalik sa Dios. Ginpaliso Niya kita sa husto nga paladulongan, ginhatag sa aton ang kapawa sang Iya presensya, kag naghatag sang katuyoan kag kahulogan sa aton mga kabuhi. Si Jesus nagpakanay sant aton mga kahadlok, naghatag sa aton sang kalipay kag pagbidait, gindaka kita palayo sa kalaglagaan nga nagapamahug sa aton, kag gindala kita sa aton puloy-an nga nagapadayon. Si Jesus Nagsiling:



**Lukas 19:10.** “Kay ang Anak sang tawo nagkari sa pagpangita kag sa pagluwas sang nadula.”

*Si Jesus nagkari sa pagluwas sa aton gikan sa sala kag sa silot sang aton mga sala.* Kita tanan nakabali sang mga kasugoan sang Dios kag nagapangatubang sang silot nga

pagkahamulag sa Iya nga walay katapusan. Apang ginkuha ni Jesus ang silot para sa aton mga sala kag kinabubot-on nga nagpakamatay para sa aton agud nga mapatawad kita.

**Mga Taga Roma 6:23.** Kay ang bayad sang sala kamatayon, apang ang bunayag nga dulot sang Dios kabuhi nga walay katapusan kay Kristo Jesus nga aton Ginuo.

*Si Jesus nagkari sa pagluwas sa aton gikan sa gahum sang sala kag ni Satanas.* Ginhilway Niya kita gikan sa aton makasasala, rebelde, kag dalok nga kinaiya kag ginhatagan kita sang bag-o nga kinaiya sang mga kaanakan sang Dios. Ginbugras Niya ang gahum sang pag-sulay kag ginahilway kita gikan sa aton mga handum kag mga bisyo nga nagahalit sang aton ikaayong lawas kag nagalaglag sang aton mga kalag. Sa kay Jesus makakita kita sang palalipdan gikan sa mga pagsalakay ni Satanas. May mga pagpakig-away pa kita, apang si Jesus naghatag sa aton sang kadalag-an.

**Mga Taga Roma 6:22.** Apang karon mga nahilway kamo sa sala.

**2 Mga Taga Corinto 5:17.** Busa ang bisan sin-o nga tawo yara kay Kristo, bag-o sia nga tinuga; ang daan nagtaliwan, yari karon ang tanan naginbag-o.

*Si Jesus nagkari sa pagluwas sa aton gikan sa mga bunga sang sala kong subong man sa presensya sang sala.* Nagdala Sia sing kaayohan para sa lawas kag sa kalag. Kag sa pila ka adlaw hatagan Niya kita sang isa ka bag-o nga lawas nga indi na matapikan sang balatian. Nagahanda Sia karon sang isa ka puloy-an sa langit para sa tanan nga ginluwas Niya gikan sa sala. Pagadalhon Niya kita sa sinang langitnon nga puloy-an. Kag sa pila ka adlaw mapasad si Jesus sang Iya pagdumalahan diri sa duta kag tinloan ang duta sa tanan nga mga

sala. Bisan pa ang kinaiya mismo mahilway gikan sa kagamo kag kalaglagaan. Ang tanantanan mangin himpit. Daw ano ka daku nga kaluwasan!

**Bugna 21:3,4.** “Yari karon ang kayangkayang sang Dios upod sa tawo. Magapuyo sia kaupod nila, kag sila mangin-iya katawohan, kag ang Dios gid magaupod sa ila; pahiran niya ang tagsa ka luha sa mga mata nila, kag wala na sing kamatayon, ukon kalisod ukon paghibi ukon kasakit pa, ang nahaunang mga butang nagtaliwan.”

### Buhata Ini

7. Sauloha ang Mga Taga Roma 6:23; 2 Mga Corinto 5:17.

8. Markahi sang X ang tupad sang mga butang nga buot mo mahilway ka.

Pagkadula . . . . .

Pagpahamulag gikan sa Dios . . . . .

Sala . . . . .

Silot bangod sang sala . . . . .

Gahum sang sala sa imo kinaiya . . . . .

Gahum ni Satanas . . . . .

Mga resulta sang sala . . . . .

Presensya sang sala . . . . .

Nabaton mo na bala ang kaluwasan nga ginatanyag ni Jesus gikan sa sining mga butang?

Kon amo, isulat ang ‘Salamat, Jesus,’ sa tupad sang mga butang nga sa diin ginhilway ka Niya. Kon wala pa, magpakighambal ka sa Iya nahanungod sini.

## Karnero sang Dios


Ang titulo nga *Karnero sang Dios* pinasahi nga nagapatuhoy sa misyon ni Jesus subong nga Manluluwas sang kalibutan.

### Halad sang Karnero

Sang magasugod na si Jesus sa Iya pagpangalagad sa publiko, ginpakilala Sia ni Juan sa isa ka daku nga panong sang mga katawhan nga nagasiling:

**Juan 1:29.** “Yari karon ang kordero sang Dios, nga nagakuha sang sala sang kalibutan!”

Yadtong mga nakabati kay Juan makabadbad sang iya mga pulong sa isa lamang ka paagi. Ang mga karnero ginapatay subong nga halad para sa sala. Ginatuad sang mga makasasala ang ila sala sa Dios kag ginapangayo sa Iya nga batunon ang kamatayon sang karnero bilang tal-os sa ila bahin. Ang halad nga ginpadala sang Dios agud mapatay para sa mga makasasala amo si Jesus — ang Karnero sang Dios nga nagakuha sang sala sang kalibutan!



Ginsulat sang daku nga propeta nga si Isaias kon paano himuon sang Dios nga isa ka halad ang Mesias para sa aton mga sala. Pagabutangbutangan Sia kag pagapatyon katulad sang isa ka kriminal. Sia ang magakuha sang silot para sa tahan naton nga mga sala. Mapatay Sia sa aton bahin, subong nga tal-os naton, agud nga mahilway kita gikan sa sala. Sa ulihi mabuhi Sia liwat, kag makita ang bunga sang Iya halad, kag malipay Sia.



Nahanabo ini tanan kay Jesus katulad gid sang ginsiling ni Isaias nga mahanabo.

**Isaias 53:3-12.** Gintamay sia kag ginsikway sang mga tawo; lalaki sa mga kasubo, kag nakakilala sang kalisud; kag subong sang isa nga gikan sa iya ang mga tawo nagatago sang ila nawong gintamay sia, kag wala naton sia pagpakamahala.

Sa pagkamatuod ginpas-an niya ang aton mga kalisud kag gindala ang aton mga kasubo; apang ginkabig naton sia nga ginpilas, ginbunal sang Dios, kag ginsakit.

Apang sia ginpilas tungod sang aton mga paglalis, ginhanog sia tungod sa aton kalautan; ang silot sang aton paghidait yara sa iya, kag sa ita mga labud ginaayo kita.

Tanan kita kaangay sang karnero nga nagtalang, naglipas kita ang tagsatagsa sa iya kaugalingon nga dalanon; kag ang Ginuo nagpapas-an sa iya sang kalautan naton nga tanan.

Ginpigus sia, kag ginsakit 'sia, apang wala sia magtikab sang iya baba; subong sang cordero nga ginadol-ong sa ihawan, kag subong sang obeha nga apa sa atubangan sang iya manug-alot, sa amo wala sia magtikab sang iya baba.

Tungod sa pagpigus kag paghukom ginkuha sia; kag nahanungod sang iya kaliwatan, sin-o bala sa ila ang nagpatugsiling nga gin-utod sia gikan sa duta sang mga buhi, ginbunal tungod sang paglalis sang akon katawohan.

Kag ginhimo nila ang iya lulobngan upod sa malauton kag upod sa maggaranon nga tawo sa iya kamatayon bisan nga wala sia magpanglugos, kag wala sing limbong sa iya baba.


Apang nahamut-an sang Ginuo ang paghanog sa iya; ginpakalisud niya sia; kon himuon niya ang iya kalag nga halad tungod sa sala, makita niya ang iya kaliwat, palawigon niya ang iya mga adlaw; ang kabubot-on sang Ginuo magauswag sang iya kamot.

Makakita sia sang kasakit sang iya kalag kag mabusog sia; tungod sa iya kaugalingon nga pagkilala ang akon matarung nga alagad magapakamatarung sing madamo kag sia magabatas sang mga kalautan nila.

Busa hatagan ko sia sing bahin upod sa mga kadalagkuan, kag magapakigbahin sia sang inagaw upod sa mga makusog; bangod nga gin-ula niya ang iya kalag tubtob sa kamatayon, kag naisipan upod sa mga malalison, apang gindala niya ang sala madamo, kag nagatabang tungod sa mga malalison.

Ginasugid sa aton sa apat ka mga ebanghelyo kon paano napatay si Jesus para sa aton mga sala. Ang mga pangulo sang relihiyon indi magbaton sa Iya subong nga Mesias. Nahisa sila sa Iya kag nagpamat-od sa pagpatay sa Iya. Ginsumbong nila Sia sa gobernador kag nag-arkila sang mga saksi sa pagsugid sang binutig nahanungod sa Iya sa tion sng Iya bista. Si Pilato, ang gobernador nga taga Roma, nakahibalo nga wala sing sala si Jesus, apang nagpasugot sia sa mga ginpangayo sang mga pangulo

sang relihiyon kag sang mga manggagamo nga ila gintipon. Ginlansang si Jesus — ang iya mga kamot kag mga tiil nalansang sa isa ka kahoy nga krus. Amo ini ang silot sa isa ka pinakamalain nga mga kriminal. Ginlansang Sia sa tunga sang duha ka kawatan sa bukid nga ganatawag Kalbaryo. Kag didto napatay ang Kordero sang Dios — ang halad para sa aton mga kasal-anan.



### Buhata Ini

9. Ano ang titulo ni Jesus nga makapahibalo sa mga katawohan nga mapatay Sia sa pagluwas sa ila gikan sa sala? . . . . .  
 . . . . .
10. Sin-o ang propeta nga nagsugid kon paano ginbutang sang Dios ang aton mga sala sa Mesias?  
 . . . . .
11. Paano napatay si Jesus? . . . . .
12. Hingalani ang duog sa diin Sia napatay . . . . .
13. Para sa ano nga sari sang katawohan nagakabagay ang amo nga sari sang kamatayon? . . . . .
14. Linyahi ang mga dinalan sa Isaias 53 nga nagapatuhoy sa imo.


## Mga balatyagon nga ginpatuhoy sa Karnero

Makita naton ang larawan sang bilog nga kalibutan, sa mga balatyagon sang mga katawhan sa Kalbaryo. Ginatulok sang iban si Jesus nga may pagkaugot, ginkadlawan Sia kag ang Iya mga ginsiling nahanungod sa Iya kauglingon. Ang iban daw wala lamang nagabalaka, nga ginabahinbahin ang iya mga panapton sang nagahimomugto Sia. Apang ang iban nagatulok kay Jesus nga may pagtuo, paglaum, kag gugma.

Tatlo ka mga krus ang nagtindog didto sa bukid; tatlo ka mga tawo ang napatay sa amo nga adlaw sa Kalbaryo. Sa mga balatyagon nila mahimo naton nga makita ang yabi sa aton kaugalingon.

**Lukas 23:33,34,39,-43.** Ginlansang nila sia sa krus, kag ang mga malauton, ang isa sa tuo kag ang isa sa wala. Kag si Jesus nagsiling, “Amay, patawara sila; kay wala sila makahibalo sang ila ginahimo.”

Ang isa sang mga malauton nga ginbitay nagbuyayaw sa iya, nga nagasiling, “Indi bala ikaw ang Kristo? Luwasa ang imo kaugalingon kag kami!” Apang ang isa nagsabdong sa iya nga nagasiling, “Wala ka gid bala mahadlok sa Dios, sanglit yara ka sa amo man nga katagudilian? Kag sa aton matarung gid; kay nagabaton kita sang nagakaigo nga balos sa aton mga buhat; apang ining tawo walay nahimo nga sayop” Kag nagsiling sia, “Jesus, dumdoma akon kon magsulod ka sa imo ginharian.” Kag nagsabat sia sa iya, “Sa pagkamatuod, nagasiling ako sa imo, karon nga adlaw mangin-kaupod ka nakon sa Paraiso.”




Nagahambal sa aton ang tatlo ka mga krus sang: 1) pagribuk, 2) pagtubos, 3) paghinulsol. Sa isa napatay ang tawo *bangod sang* sala. Sa ikaduha ang Karnero sang Dios napatay *para sa* sala. Sa ikatatlo isa ka makasasala nga napatay *sa* sala.

**Pagribuk.** Sa krus sang pagribuk nabitay ang isa ka tawo nga napatay *bangod sang* iya mga sala. Gin-usikan niya ang iya kabuhi sa paghimo sang malain. Ang kabuhi naghimo sa iya nga mapait kag matig-a. Kag karon nagapangatubang sia sang kamatayon — ang katapusan nga pagkalutos. May bulig nga nagahulat sa iya tupad, kon nagtuo lamang sia. Yari sia



sa presensya sang Dios. Apang ang pagribuk sa iya tagipusoon nagbulag sa iya sa mga espirituhanon nga kamatuoran. Napatay sia sa atubangan sang Manluluwas sa mapait nga pag-ugayong sang espiritu — puno sang kaagig, pagpamuyayaw, kag pagkawalay paglaum.



**Pagtubos.** Sa natunga nga krus napatay si Jesus *para sa* aton mga sala agud nga matubos kita. Gindayaan kita tanan ni Satanas, gintaban, kag ginhimo kita nga mga ulipon niya. Ang kamatayon sang Anak sang Dios amo ang bayad sa pagtubos sa aton. Gintubos niya kita gikan sa gahum ni Satanas — gindala pabalik sa Iya kaugalingon — sang napatay Sia bilang tal-os sa aton.

**1 Pedro 1:18,19.** Gintubos kamo. . .sang hamiling dugo ni Kristo subong sang kordero nga walay kasawayan kag walay dagta.

**Paghinulsol.** Sa ikatatlo nga krus napatay ang isa ka makasasala sa iya mga sala nahilway gikan sa sala sing walay katubtoban, paagi sa pagsalig kay Jesus. Ini nga tawo wala nahadlok nga mag-atubang sang iya kaugalingon kag sa kamatuoran; Nagtuad sia nga nakasala sia. Ginkilala niya si Jesus nga Manluluwas ang Mesias.



Nagahimumogto si Jesus apang ang mahinulsolon nga makawat nagtuo nga magadumala Sia sang kalibutan sa pila ka adlaw. Busa ginpangayo niya sa Manluluwas nga panumdomon sia (kaluoyan sia) kon mahimo na Sia nga Hari. Daw ano nga pagtuo! Ang isa sa mga katapusan nga ginhimo ni Jesus bag-o Sia mapatay amo ang pagpatawad sang mga kasal-anan sang nagahimumogto nga kawatan kag ginhatagan sang kabuhi nga walay katapusan.

Ginapamatbatan sang tagsa ka tinuga ang paladulongan niya sa pihak nga kabuhi paagi sa kon ano ang ginabuhat niya sa Manluluwas. Magkatulad ang kahigayunan sang duha ka kawatan. Ang isa nagkapyot sa iya pagribuk, kaakig, nagayaguta sang Isa nga makaluwas sa iya. Ang Isa naghinulsol kag nangayo sang kaluoy. Ang isa nagkadto sa impiyerno — duog sang walay katapusan nga pag-antos. Ang isa nagkadto sa langit (Paraiso) — duog sang walay katapusan nga kalipay. Ining duha ka tawo amo ang larawan naton tanan. Ang isa nagribuk kag nadula. Ang isa naghinulsol, nagtuad sang iya pagkinahanglan kay Jesus kag naluwas.




Sa diin sining mga halimbawa ang pagasundon mo? Makakita ikaw sang walay katapusan nga kabuhi kapatawaran, paghidait, kag bulig paagi sa pagpanawag kay Jesus sa pangamuyo. Malapit Sia sa imo karon.

**Mga Taga Efeso 1:6, 7.** Sa pagdayaw sang iya mahimayaon nga bugay, nga ginbugay niya sa aton sa Hinigugma. Sa iya may pagtubos kita paagi sa iya dugo, nga amo ang kapatawaran sang aton mga paglapas.

1 Pedro 2:24,25. Sia gid nagdala sang aton mga sala sa iya lawas sa kahoy, agud nga kita mapatay sa sala kag magkabuhi sa pagkamatarung. Bangod sang iya mga pilas nag-ayo kamo. Kay nagtalang kamo subong sang mga karnero, apang karon nagbalik sa Manugpahalab kag Manugtatap sang inyo mga kalag.

### Buhata Ini

15. Isulat ang mga titulo sa ibabaw sang tatlo ka mga krus sa idalum. Isulat ang imo ngalan sa idalum sang krus nga nagalarawan sang imo kahimtangan. Ipaathag ang laragway sa isa mo ka abyan ukon sa mga katapo sang imo panimalay.



16. Usisaa ang imo mga sabet kag sulati ang imo rekord sang bumolutho para sa leksyon 8.



## Leksyon 8 - Mga Sabat

Ang mga pamangkot nagakinahanglan sang 12 ka mga sabat. Kon may husto ikaw nga sabat halin sa 11 tubtob 12, markahi ang imo grado sang labing maayo. Halin sa 9 tubtob sa 10, maayo; 6 tubtob sa 8, kasarangan. Kon manubo sa 6 ang husto mo nga sabat, basaha liwat ang leksyon.

1. Manluluwas (ukon si Jehovan magaluwas).
2. k) Ang Dios nga Amay
4. b) ang a) kag b) sa ibabaw
9. Karnero sang Dios
10. Isaias 53.
11. Sa krus (ukon ginlansang).
12. Kalbaryo.
13. Pinakamalain nga mga kriminal.
15. Mga titulo: Pagribuk, Pagtubos, Paghinulsol.

Kadamuon sang husto nga sabat . . . . Grado . . . .  
 Karon sulati ang imo rekord sang bumolutho para sa  
 leksyon 8.